

IL CANTIN AL SARÀ SCANDAIÂT TAL CONGRÈS DE SOCIETÂT SIENTIFICHE E TECNOLOGJICHE FURLANE AI 30 DI OTUBAR

Scrivi tal blog par furlan

I socis si daran dongje chest an tal municipi di Sant Vît dal Tiliment par continuâ a difondi lis cognossincis tai setôrs tecnologjics e sientifics doprant la lenghe furlane

ADÏS AGNS DE SÔ fondazion, la Societât sientifiche e tecnologjiche furlane e celebre sabide ai 30 di Otubar il so congrès anuâl numar nûf. I membris de socie, che e cjape dentri docents universitaris, ricercjadôrs e studiôs, a van indevant tal lôr intindiment di difondi lis cognossincis tai setôrs tecnologjics e sientifics doprant la lenghe furlane.

Dilunc dal congrès di Sant Vît al sarà spazi ancje pai plui zovins midiant la relacion che e varà par titul «Scrivi tal blog. Adolescents e alfabetizazion in furlan». A fevelâ di chest progjet a saran la docente di Didatiche des lenghis modernis de Universitât dal Friûl e segretarie de Societât, Alessandra Burelli, lis professoris des scuelis mediis di Listize e di Morteau, Paola Beltrame, di Cividât, Maria Cristina Cescutti, di Felet, Ornella Comuzzo, cul jutori dal tecnic informatic Gianluca Franco.

«Si trate di une ricercje tacade tal 2007 midiant i finanziaments de leç regionâl 15/96, destinâts al Centri interdipartimentâl pe culture e la lenghe dal Friûl dal ateneu traviere une convenzion di pueste jenfri Region e Universitât dal Friûl – nus à dit Burelli –. Il prin an o vin lavorât cu lis trê docentis Beltrame, Cescutti e Comuz-

zo cjapant dentri in dut 78 arlêfs di dôs classis des scuelis mediis di Listize e Morteau e di une classe de scuele medie dal istitût «Pauli Diacun» di Cividât e une di chê di Felet». L'intindiment al è stât chel di dâi vite a un blog (<http://frakeki.uniud.it>), imprest une vore ben acet dai plui zovins par tratâ e condividi svariâts argoments traviere tescj, imagjinis e filmâts, scrit dut par furlan in maniere di stazâ il lôr ategjament viers la marilenghe e il so ûs personâl e sociâl. In plui, midiant chest spazi sul web creât di pueste te suaze dal sît de Universitât dal Friûl, al è stât pussibil svicinâsi al furlan doprât dai adolescents, viodint cualis che a son lis tematichis plui afrontadis e cualis lis sieltis linguistichis preferidis.

«Tal prin an de ricercje o vin fevelât cui fruts di ce che al è un blog, inscuelantju su cemût gjestilu – nus à contât Alessandra Burelli –. Po, midiant e-mail, i arlêfs des classis des scuelis di Cividât, Felet, Listize e Morteau si son cognossûts e a àn sielzût il non dal blog. L'an dopo, te anade 2008/'09, i students a àn tacât a scrivi articui pal blog, si che duncje noaltris o vin scomençât a valutâ il lôr lavôr par po corezilu te grafie furlane uficiâl e po pubblicâlu sul web».



Si fevelarà ancje di scritture par furlan tal blog dilunc dal congrès a Sant Vît.

Tal 2009/'10 i students cjapâts dentri te ricercje a son stâts 138, sparniçâts in dis classis diviersis, viodût che a son jentradis tal progjet ancje une classe di Dael (professôr Dario Chialchia) e un grup di fruts di Spilimberc (professore Maria Liana Rigutto). «O vin viodût che ancje i zovins che no vevin nancje la competence orâl dal furlan no àn vût masse fastidis tal assimilâ la grafie – e à zontât Burelli –; lis dificultâts plui grandis però a son l'ûs dai pronoms e une sintassi pluitost puare cun tancj neologjisms e talianisims. In ogni câs, ur vin insegnât a doprâ i imprescj plui utii par scrivi par furlan tant che dizionaris su cjarte e su pc e i coretôrs ortografics. I argoments plui tocjâts? Chei peâts ae scuele, po sport e musiche».